

समे – 12:25

<><><><><><>

Constitution Day

अज्ज संविधान दिवस ऐ। अज्जै दे रोज 1949 च संविधान सभा आस्सेआ संविधान गी स्वीकार कीता गेआ हा ते मगरा 26 जनवरी 1950 गी इसी लागू करी दित्ता गेआ हा। संविधान दिवस दी कीजे एह 75मीं ब'रेगंड ऐ इस करियै अज्जै थमां साल भर चलने आले समारोहें दी शुरूआत बी कीती जा'रदी ऐ। एह समारोह 26 नवम्बर 2025 तगर मुख्य भरै च आयोजत कीते जांगन। इस मौके पर अज्ज संविधान सदन दे केन्द्री कक्ष च लोआए गेदे इक बड्डे समारोह च राष्ट्रपति द्रौपदी मुर्मू होरें संसद दे दौनें सदनें गी संबोधत कीता। भारत गी लोकतंत्र दी जननी गलांदे होई राष्ट्रपति होर संविधान निर्माण दी प्रक्रिया गी चेता कीता। उनें आखेआ जे साढ़ा संविधान सब्बने भारतीये लैई सब्बने शा पवित्र पुस्तक ऐ जिसी साक्षी मन्नियै असंगी किट्ठे रलियै देशें गी तरक्की दी बतै पर अगड़े लैई जाने लैई कम्म करना होग। राष्ट्रपति होरें इस मौके मुख्य च होआ'रदी तरक्की ते विकास दिएं उपलब्धिएं गी बी उजागर कीता। उनें आखेआ जे साढ़ा संविधान सब्बने लैई बरोबरी दे अधिकारगी जकीनी बनांदा ऐ। इस मौके पर उपराष्ट्रपति जगदीप धनखड़, लोकसभा दे अध्यक्ष ओम बिरला ते प्रधानमंत्री नरेन्द्र मोदी हुंदे इलावा सब्बै सांसद बी मजूद हे। संविधान दिवस दे मौके पर राष्ट्रपति होरें इक यादगारी सिक्का, इक डाक टिकट ते दऊं कताबें दा विमोचन कीता। एहदे अलावा संविधान दे संस्कृत ते मैथिली भाषा च संस्करण बी जारी कीते गे। कार्यक्रम दे खीरै च सब्बने सांसदे राष्ट्रपति हुंदे कन्नै संविधान दी प्रस्तावना पढ़ी।

<><><><><><>

JK Constitution

जम्मू कश्मीर च बी संविधान दिवस गी बड्डे पैमाने पर मनाया जा'रदा ऐ। आकाशवाणी दे जम्मू संवाददाता नै जानकारी दित्ती ऐ जे मुख कार्यक्रम श्रीनगर दे शोरे कश्मीर कनवेंशन सेंटर आयोजत कीता जा'रदा ऐ, जित्थें इस मौके संविधान दी प्रस्तावना पढ़ी जाग। इससै चाल्ली अज्ज सब्बने सरकारी दफतरें, खुदमुक्तियार निकाय, स्कूलें, कालजें, सार्वजनिक क्षेत्र दे उपक्रमें, च बी विशेष आयोजन कीते जा'रदे न। ग्रामीण विकास ते पंचैतर राज मैहकमे

आस्सेआ सब्बने पंचैतें ते अमृत सरोवर आलिएं थाहरें पर संविधान प्रस्तावना पढ़ने दे कार्यक्रमें दा सरिस्ता कीता जा'रदा ऐ। सरकारै सब्बने लोकें गी आग्रह कीता ऐ जे ओह संविधान दिवस सरबंधी कार्यक्रमें ते समारोहें दे फोटू एहदे लेई समर्पत वैबसाइट www.constitution75.com उप्पर अपलोड करन।

<><><><><><>

PM-Constitution Day

प्रधानमंत्री नरेन्द्र मोदी होरें अज्ज संविधान दिवस दे मौके पर सब्बने देशवासिएं गी ममारकबाद दित्ती ऐ। अपनी इक सोशल मीडिया पोस्ट पर मोदी होरें लिखेआ जे साढ़ां संविधान मुख्खै दिएं ज्हारा ब'रे परानिएं महान परम्पराएं दा आधुनिक सरूप च वर्णन ऐ। उनें आखेआ जे अज्ज देश अपनी बन्न सबन्नी परम्पराएं ते संस्कृतिएं पर मान करदे होई तेजिया कन्नै तरक्की दी बत्तै पर अगड़े बधे करदा ऐ। प्रधानमंत्री नरेन्द्र मोदी होर अज्ज संजा सुप्रीम कोर्ट च आयोजित संविधान दिवस समारोह च शामिल होंगन। इस मौके पर ओ मजूद लोकें गी संबोधत बी करगंन। एहदे इलावा मोदी होर न्यायपालिका दी सलाना रिपोर्ट बी जारी करगंन। इस मौके पर केन्द्री कनून मंत्री अर्जुन राम मेघवाल, प्रधान न्यायधीश जस्टिस संजीव खन्ना ते सुप्रीम कोर्ट दे होर जज बी मजूद रौंहगन।

<><><><><><>

JK-Information Security

जम्मू कश्मीर सरकार नै अपने अधिकारिएं गी गलाया ऐ जे खुफिया ते बड़ी मती खुफिया जानकारीएं गी इंटरनेट उप्पर सांझा नेई करन ते विषेश जानकारी उप्पर चर्चा करदे दरान स्मार्ट फोन गी बैठक कक्ष दे बाहर जमा कराई देना लोड़चदा ऐ। सरकार ने अधिकारिएं ते कर्मचारिएं बश्कार संवेदनशील खुफिया ते बड़ी मती खुफिया जानकारी प्रसारत करने लेई वट्स ऐप, जीमेल ते इयै जनेह् होर दुए मंचे दा इस्तेमाल करने दे बधार'रदे चलन बारे चैंता बुज्झी ऐ। जारी इतलाह मूजब एहदे कन्नै जानकारी दी गोपनीयता ते सुरक्षा बारे संवेधनशीलता पैदा होंदी ऐ। सरकार ने गलाया ऐ जे त्रीये पक्ख दे संचार उपकरणें दा इस्तेमाल करने करी डाटा दी लोआंगना ते खुफिया जानकारी दे लीक होने सनें केई होर दुए खतरे पैदा होई सकदे न।

<><><><><><>

IFFI Goa

गोवा च चलै करदे भारत दे अंतर्राष्ट्रीय फिल्मोत्सव दा अज्ज 70 कोला मतियां फिल्मां दस्सियां जांगन। फिल्मोत्सव दे अज्ज 6में रोज दस्सी जाने आलिएं फिल्में च भारत दियां किश प्रमुख फिल्मां जिंदे च इंडिया वोटस, स्ट्राइड ते बियांड द कोर्ट : द इंडियन व्हीलचेयर बास्केटबॉल जर्नी बी शामिल न। इस मौके फिल्में दे प्रसारण लेई ऐसी बवस्था कीती गेदिएं ऐ जे नेत्रहीन लोक सुनियै ते सुनी नेई सकने आले संकेत भाषा राएं इनें फिल्में दा नंद लेई सकदे न। फिल्मां दिक्खने आलें लेई थैटर दे इलावा ओपन एयर थैटरें ते समुंद्र दे कंडे बी फिल्मां दस्सने दी बवस्था कीती गेदी ऐ तां जे ओ इंदा हर मुमकिन बेहतर ढंगै नै नंद ठोआई सकन।

<><><><><><>

JK-IPL Auction

सउदी अरब च आयोजित आईपीएल 2025 दी निलामी च जम्मू कश्मीर दे 14 खडारिएं थमां 4 खडारिएं गी चुनेआ गेआ ते 10एं खडारिएं गी नेई चुनेआ गेआ ऐ। पैहले दिन 2 खडारी चुने गे ते दुए दिन बी दऊं खडारिएं लेई बोली लग्गी। कुलगाम दे बसनीक तेज गेंदबाज रसीख सलाम गी रॉयल चैलेंजर बंगलोर नै बड्डी रकम 6 करोड़ कन्नै खरीदेआ, जम्मू दे ऑल राउंडर अब्दुल्ल समध गी लखनऊ युपर जायंटस नै 4 करोड़ 20 लक्ख कन्नै खरीदेआ। जम्मू कश्मीर दे ऑल राउंडर युद्धवार सिंह गी बी आरसीबी नै 35 लक्ख रपे कन्ने खरीदेआ। तोआई तेज गेंदबाज उमरान मलिक गी कोलकाता नाईट राईडर नै 75 लक्ख रपे कन्नै अपनी टीम च शामिल कीता

<><><><><><>